

Ɔwulúá Paulo Lówanlín Sísí Efesofó

Itsiáha

1 ¹Mí Paulo ání Bulu apé su nabwé Kristo Yesu *sumbí ɔyɔpó, dé ɔwulú ánfí wanlín sísí mli Bulu ahá ání mlahɔ Kristo Yesu gyi, mla monyɔ mlahbwé kule, mlibu Efeso wúlutɔ. Nde mli itsiá ha.

²Ani Sí Bulu mva ani Wíe Yesu Kristo bugyíi mli buale, abuha mli iwilwii.

Ɔsúsú Oyúla Ání Anbu Kristotɔ

Efe

³Mliha akanfu ani Wíe Yesu Kristo mu Si pú mu Bulu. Tsúfé tsun ania Kristonyɔ ikulebwetɔ á, alapú ɔhétɔ atɔ́a íbékpa ani féé yúlá ani tsú ɔsúsú. ⁴Asa Bulu lóbwé ɔyí á, ɔlele ani bwé mu kle tsun ania Kristonyɔ kulebwesu, ání abwée ahá ání amó iwí letin, ifin kuku má ani iwí mu ansítɔ.

⁵Ínɔ́á Bulu tɔdwé ani su á, ɔɔbwé agywun yáí ɔbée, mɔ́pu ani bwé mu abí tsun Yesu Kristosu. Inu gyí tɔ́a olekle, igyi mu apé ní. ⁶Mliha akanfu Bulu, mu awitɔle anfi ibu numnyam, ɔɔwa tsun mu Bi ɔdwepúsú há ani faan anfi su. ⁷Ɔɔpu mu Bi ámu obugya ká ani nwunsu ikɔ, sí ani lakpan kíé ani. Awitɔle anfi Bulu léhie wá há ani ánfí ibu ifú dɔbi. ⁸Mu nyánsa pú mu asún-asinu lalé mú féé ɔwan súná ani tsun ɔkpa tsɔtsɔwtsɔsu.

⁹Alahá anɔlabí mu asun ɔhainhé ání ɔlekiklí yáí dodoodo ɔbée, mɔ́bwe tsun Kristosu. ¹⁰Mu asun ɔhainhé amu gyí, ní bré ámu ifun a, mɔ́bwe mu atɔ bwehéá ibu ɔsú mɔ́a asi féé kule, púwá ani Wíe Kristo asi.

¹¹Bulu tehá mu nwuntɔ asún pú mu apé teba mótɔ brégyíbré. Mu onutó léle aní ɔbéé abwée mu abí tsun ania Kristonyɔ uklebwetɔ. Tsúfé alí ɔlobwe agywun yáí dodoodo ni. ¹²Ɔlele aní agyankpapu ámúú aní ansí dun Kristosu ámu ɔbéé, abékanfú mu numnyam.

¹³Alí ilegyi ha mli é ní. Bré ámúú mlílónu ɔnɔkwali asún, igyi *asun wankláán ámúú ulɔhɔ mli nkpa ámu, ho músú gyi ɔpá mlia Kristonyɔ mlílóbwe kule. Bulu lópu mu Ɖɛ Wankíhé amu hie mli nsu, púsúná ání mubú mli, fé alí ámúú ɔlehie yaí ɔbéé móbwe ámu. ¹⁴*Ɖɛ Wankíhé amu gyí ntswiasíá idesuná ání aní ibi béda agyapadie ámúú Bulu léla yáí há mu abí ámu ni. Idesuná ání alaká aní nwunsu ukɔ, púwá mu numnyam.

Paulo Mpái

¹⁵Mú alí su, tsú bréá nonu ání mlilahɔ aní Wíe Yesu gyi, pú alíá mlitɔdwé Bulu ahá féé á, ¹⁶mmɔkúsí Bulu ipán da mli nwunsu. Ní nde mpái bɔ á, ntekáín mli su. ¹⁷Ntokókóli aní Wíe Yesu Kristo Bulu, numnyam Ɖsí ámu mbée, ɔhá mu Ɖɛ ámu ɔha mli nyánsa. Ule mu ɔwan súná mli, méni mlébi mu wankláán. ¹⁸Ntokólí mu mbée, obwíi mli ansí, amliwun atɔ wankláán ámúú ɔbéé, mlibéki ɔkpa ha ámu, méni mlébi ání atɔ ámúú ɔlelayáí há mu ahá ámu ihíé bu bíá. ¹⁹Ɖhá amlibu ání mu túmi dun túmi kugyíku há aní ahógyipu. Mu túmi ánfu ɔma a, kuku má unu. ²⁰Mú kén ɔlele súná bréá ɔlokusúá Kristo tsú afúlitɔ, pú mu yéyaí mu gyɔpɔsu ɔsúsú unu ní. ²¹Lnú Kristo dé iwíe gyí awíe féé, túmi kugyíku, *ɔɛ laláhe pú ɔmásógyí túmi féésú ni. Mu dibia dun dibia kugyíkuvá ibu nu séi pú ɔyí ámúú ibéba amutɔ. ²²Bulu lópu tógyítɔ wá mu asi, ɔɔpu mu bwé tógyítɔ nwun há mu ɔpasua. ²³Ɖpasua ámu gyí Kristo ɔyulúv. Kristo wá ɔpasua ámu tenyá túmi kugyíku tsú. Mutéhá tógyítɔ tɔwá alé yi ɔtínegyíɔtíne.

Tsú Nkpa Dadatɔ Ba Pópwetɔ

2 ¹Asa mlilémlí Akristofɔ á, asutɔ-ɔnlun móa lakpanbwe su mligyí ɔɛtɔ aha wuhé. ²Alí bré ámutɔ á, mlilétsiá

ɔmátɔfɔ atsiábi. Mlulóbuo *ɔɲe laláhe féé owíe ɔbunsám. Mɔgyí ɔɲe laláhe ání ide agyómá yɔ ahá ámú butamabú Bulu ámuto ní. ³Lélé mú á, aní féé anlétsiá amú atsiábi, bwé lalaheá aní ɔwólú léklé. Anulóbuo tɔá aní ɔyulúvú pú aní agywun létsiá súná aní. Tsiátɔ anfi sù teki Bulu ɔbébití aní usv fé aha atráhe ni.

⁴⁻⁵Táme íniá Bulu nwewúun itsɔ, ɔtehié dwé aní sv á, ɔlotsun ania Kristonyɔ ukulebwesu há aní nkpa, bré ámú anigyí aha wuhé Bulu ansítɔ aní lakpan sv ámu. Mu awitɔle sù ɔlɔhɔ aní nkpa. ⁶Ania Kristo Yesunyɔ ukulebwe ánti sv Bulu lakúsúa ania munyɔ tsú lowuto, alahá aní otsiákpá Kristo wá. Ania munyɔ abégyi iwíe ɔsúsú. ⁷Bulu léle mu awitɔle kpɔnkpɔɔnkpɔnti ánti súná aní tsun Kristo Yesusu, méni ahá ání bétrá ln féé bówun ání mu awitɔle lomóní dɔn tógyítɔ. ⁸Bulu awitɔle pú mli Kristo hógyisv Bulu lótsun hɔ mli nkpa. Íni motsú mli, Bulu atokiehé igyi. ⁹Megyí mli bwehé wankláán kuku sv, méni mlitɔ ɔkuku móɔpu ibi sí kántɔ. ¹⁰Bulu lábwe aní alí ánti angyí. Alabwé aní aha ɔɔpwe tsun ania Kristo Yesunyɔ ukulebwesu, méni abóbwe yilé ání mu onutó ɔlela yáí há aní ɔbéé abwée.

Kristoto ukulebwe

¹¹Mú sv mlíkain ání teki ɔmátɔfɔ mligyi. Bré ámu a, Yudafo butetí mli beɛ, “Ahá ání bumetun *keté,” bótetí amú iwí keté atínpv. (Táme ketétún amu ó á, nyankpusa ɔyulúsv pú ibi ɔnɔ atɔ igyi.) ¹²Mlúkain ání alí bré ámuto á, mliméyín Kristo. Afɔ mligyi. Mlimégyí Yudafo ɔkpagyíɔkpasv. Mlumá ogyíkpá Bulu nhúhé ámú ɔleka mú iwí ntam há Yudafo ámuto. Múá idun kúráá á, mli ansí medín tɔtɔsv, mliméyín mu é. ¹³Táme séi á, mli Kristo Yesunyɔ mlilabwé kule. Íni sv Kristo latsun mu obugya amú ɔletseí wólí há ania mlunyɔ ámusv, kpá mli ahá ánti teki mliɔv ífɔ ánti ba Bulu wá. ¹⁴Tsúfé Kristo onutó lapú iwílwii wá Yudafo pú ɔmá bámbásúfɔ nsúné, bwé aní afunka anyɔ ámu féé kule. Alalé olu ámú ɔlɔbwe buntíi wá aní nsúné ámu. ¹⁵ɔleka Yudafo mbla pú amú amándíétɔ, méni afunka anyɔ amú bóbwe

ɔpasua ɔɔpwe ikule mutɔ. Fówun mua amúnɔ bóbwe kule, iwilwii bétsiá amú nsuné. ¹⁶Ɔlotsun mu *oyikpalíhesu lowu ámusu lé olu lé amú nsuné. Oyikpalíhe amusu ɔlotsun tswi amúa Bulunɔ ɔnɔ ntsu. ¹⁷Bréá Kristo lébá a, ɔleda Bulu iwilwii asún ámu ɔkan há ahá féé. Mli ɔmátɔfɔ ání mli Bulunɔ nsuné bu ífɔ pú Yudafo ání amúa Bulunɔ nsuné ma ífɔ féétɔ. ¹⁸Kristo su ɔkpa latíí há aní afunka anyɔ ámu féé. *Ɔɲe Wankíhé ámu su abétalí ba aní Sí Bulu ansítɔ.

¹⁹Íni su mlitráa mlimégyí afɔɔ. Mli Bulu ahá mlulabwé ikule, mligyí Bulu wóyí abí. ²⁰Mligyí fé obuá bayi. Yesu sumbí ayɔpú ámu pú Bulu ɔnɔsú atɔpú amu gyí mú nkpabí. Kristo Yesu onutó gyí obu ámu ɔtan. ²¹Mu su obu ámu itsa aba hógyitɔ. Mutéhá mú itomóní bwé Bulu ɔtswékpa obu wankíhé. ²²Íniá mli Kristonɔ mlulabwé ikule su á, ɔde mli Yudafo ámu pɔtsá abasu, ɔde obu ání Bulu obétsiá mútɔ ɔɲétɔ yíi.

Paulo Ɔmá Bámbásúfɔ Bulu Asún Bláa

3 ¹Mí Paulo nda obu Kristo Yesu *asun wankláán ámú nde ɔkan da mli ahá ání mlimégyí Yudafoɔ ámu su. ²Nyin ání mlilanú awitɔleá Bulu lówa há mí, pú agyómá ánfɔ wá mí ibitɔ ɔbéé, mbwéé, iwa labi ha mli. ³Bulu léle mu asun ɲáínhé ámú ɔlekíklí yaí ámu ɔwan súná mí. Mú nawánlín kútúklú á. ⁴Ní mlekla ɔwulú ánfɔ a, íbɔwankí mli ání nanú Kristo íwɔ asun ɲáínhé amu asi. ⁵Tsú ɔyí ɔpá á, Bulu mókúlé asun ɲáínhé anfi súná nyankpusa ɔkuku. Táme séi ánfɔ á, alabele mú ɔwan tsun mu Ɔɲé ámusu súná ahá ámú alalé, bɔgyi mu sumbí ayɔpú pú mu ɔnɔsú atɔpú wankíhé amu. ⁶Mu asun ɲáínhé amu gyí, Bulu layúlá ɔmá bámbásúfɔ é fé Yudafo, tsun mu asun wankláán ámusu. Amúa Yudafo bamli ɔlepe ɔkuletɔ atɔ agyípú, alabwé amúa Yudafo kule. Mú su babwé ɔyulúv kule. Amú é bénya atɔ ámú Bulu léhie ání ɔbéha Yudafo tsun Kristo Yesusu ámu ku.

⁷Ína Bulu awitɔle pú mu túmisu ɔlɔbwe mí mu asun wankláán ámu osúmpú. ⁸Íbu mútɔá kebikusu ngyi Bulu

ahá féétɔ́. Táme Bulu lówa awitɔle há mí ɔ́bée, ndáa Kristo oyúla amúbú idun blí ámu iwɪ ɔkan ha ahá ání bumegyí Yudafɔ. ⁹Mulówa mí ɔ́bée, nháa anyánkɔ́pɔsa féé abubu alíá ɔdepu mu asun ñáínhé amu yó agyómá. Mulóbwé ɔsú múa asi, ɔɔpu mu asún ánfɪ ñáín tsú ɔyí ɔpá. ¹⁰Ɔɔbwé mú alɪ, ménɪ ɔbótsun mu ɔpasua ámusu lé mu nyánsa ɔtsan-ɔtsan súná ɔhe laláhe awíe pú atúmipúá bubu ɔtínéá buɔe iwíe gyí féé. ¹¹Íni gyí tɔ́á Bulu léhuhíe yaí asa ɔlele ɔyí ní. Alahá mú ulaba mútɔ́ séi tsun anɪ Wíe Kristo Yesusu. ¹²Íniá anɪlahɔ mu gyí, anɪa munyɔ anɪlabwé ikule su á, abétalí wá klun yó mu ansítɔ́ faan, anuméetrá nya ifú. ¹³Mú su nde ipa bwíí há mlɪ mbée, mlumáha abato iwu mlɪ, iwɔsun ánfɪ ndewúun ha mlɪ ánfɪ su, tsúfé ibówa labi há mlɪ.

Kristo Ɔdwe

¹⁴Íni su mí akpawunu iyi asi, nde anɪ Sí ámu kokóli. ¹⁵Mutɔ́ abusuan kugyíkuá ibu ɔsú múa asi lelun tsu. ¹⁶Mubúú oyúla akɔ́nɔnɔntɪ há mu abí. Mú su nde mu kokóli mbée, mu Ɔñé ámu ɔhíe wa mlɪ ɔkláa ɔwunlín tsu mu oyúla kɔ́nɔnɔntɪ atokiehé ámutɔ́, ¹⁷Kristo ɔtsun mlɪ hógýisu tsia mlɪ kluntɔ́ brégyíbré. Nde mu kulí mbée, ɔhá amlɪle nlín yɔ ɔtótɔ́, Buludwe pú mlɪ abadwetɔ́, amlɪlu kínkíínkín. ¹⁸Fówun mlɪa Bulu ahá atráhe mlétalí bí ání Kristo ɔdwe lehié móní, lehié téí, ihíe bu iswí, lehié fúá, lehié wíe ɔtótɔ́. ¹⁹Ntráa nde mu kokóli mbée, ɔhá amlɪbu Kristo ɔdwe ámúbú nyankɔ́pɔsa ɔkuku méetalí nú mú asi yi amu. Fówun mlɪ tsiátɔ́ bóbwe fé Bulu klé.

²⁰Íniá Bulu túmi de agyómá yɔ anɪtɔ́ su á, ɔtetálí bwé atɔ́ há anɪ dun alíá anɪtɔ́kúlí mu, ntée anɪtosúsu. ²¹Íni su mlɪha akanfu Bulu. Anyánkɔ́pɔsa ulíntɔ́ féé bukánfu mu atɔ́ akɔ́nɔnɔntɪ ámúbú ɔdebwe Kristo Yesu pú ɔpasua ámutɔ́ ámu su, tsú séi yófun bréá utamatá. *Amen!

Ana Kristonyɔ Uklebwe

4 ¹Íni su mí ánfɪ nda obu anɪ Wíe agyómá yɔ su ánfɪ nde ipa bwíí há mlɪ mbée, mlɪtsía tsiátɔ́ oduá ulékanáa

alɔ́a Bulu léle mli ɔ́bée, mlibétsiá. ²Mliba iwiasɔ́, amlilwii. Mlunya klun ha aba, amludwe aba. ³Ɖɛ Wankíhé amu lahá mlibabwé kule. Mú su mlibo mbódí amlitsia iwilwiitɔ́, ménu ukulebwe ámu ibétsiá mlitɔ́ yó. ⁴Ɖyulúv kule iwɔ́ ntobí anɔ́ fée anɔ́yí. Ɖɛ Wankíhé kule pé bu unv. Alɔ́ kén Bulu léle anɔ́ fée ɔ́bée, abéki toku kule pé ɔ́kpa ní. ⁵Owíe ɔ́kule; hógyi kule; *asúbɔ́ kule. ⁶Bulu ɔ́kule. Mɔ́gyí anɔ́ fée Ɖsí. Mudé anɔ́ féesú gyí, ɔ́de agyúmá yɔ́ tsvn anɔ́ féesú, otsie anɔ́ féeótɔ́.

⁷Kristo lówa awitɔ́le ye atokiehé há anɔ́ fée ɔ́bée, apúyɔ́ mu agyúmá, ⁸fé alɔ́a ɔ́wanlín wá Bulu asún ámutɔ́ bɛɛ,

“Bréá ɔ́lɔ́yɔ́ ɔ́súsú á,
ɔ́lekpa ndoun buo iwɔ́,
kíe ahá atɔ́.”

⁹Ní ɔ́wanlín wá Bulu asún ámutɔ́ bɛɛ, “Ɖlɔ́yɔ́ ɔ́súsú” á, idesuná ání Kristo légyankpá kplí wíe ɔ́sulúv. ¹⁰Múmú idesuná ání ɔ́há ámutú ɔ́lekplí wíe ɔ́sulúv ámu kén lóyɔ́ ɔ́súsú, ɔ́tínéá ulɔ́fúá dun ni, ménu ɔ́bɔ́bulá ɔ́sú múa asɔ́ fée, há mú ifun. ¹¹Kristo onutó lóbwe anutɔ́ aku mu *sumbí ayɔ́pú. Aku Bulu ɔ́nɔ́sú atɔ́ipú. Aku mu *asun wankláán ámu ɔ́kan adapú. Aku é akpapú pú asunápú. ¹²Kristo léle amú alɔ́, ménu Bulu ahá bétalí yó mu agyúmá, púwá Kristo ɔ́yulúv ukule; ígyi mu ɔ́pasua ámu ɔ́wunlín, ¹³ménu anɔ́ fée abɔ́bwe kule hógyitɔ́, bí Bulu mu Bi ámu. Fówun abédan, fun ɔ́kpagyíɔ́kpasu fé Kristo. ¹⁴Íni su animéetrá bwe fé nyebíá ahá ání amú ɔ́nɔ́ bu ɔ́dwe bétalí pú amú atosunáhé pɔ́pwe kugyíku bemlé, fé alɔ́a ntsu tedá ɔ́klun ya ɔ́tínegyíɔ́tínéá ideklé. ¹⁵Mboún mliha abláa aba ɔ́nɔ́kwali asún ámu ɔ́dwetɔ́, ménu abédan tógyítótɔ́, bwé fé Kristo, ogyi ɔ́pasua ámu nwon. ¹⁶Ína musu ɔ́yulúv, ígyi ɔ́pasua ámu ɔ́tínegyíɔ́tíné itsa aba, ide aba wankláán. Ní nyankpusa-oyí iwɔ́ ntobí ámu fée ide mú agyúmá yɔ́ wankláán á, Kristo tehá mú itedan ɔ́dwetɔ́.

Nkpa Dada Múá Pópwe

¹⁷Mú su nde mli ɔ́lá da anɔ́ Wíe idátɔ́ mbée, mlimátrá tsiá fé ahá ání bumeyín Bulu. Itɔ́a mɔ́ɔ́wa labi há amú iwɔ́ butɔ́gywín. ¹⁸Amú nwuntɔ́ lóklun. Mú su buma nkpa

ɔɔpwe amúú itsú Bulu wá ámu, tsúfé bumeyín tɔtɔ. Iklunto bu amú odwin. ¹⁹Lalahɛbwe tamawá amú péli, butekle hakpanla kugyíku bwe. Butɔbwe lalahɛ kugyíku, butamatálí kítá iwi.

²⁰Táme mli mú á, megyí tsiátɔ anfi odu mlulékasí tsú Kristo iwi. ²¹Nyin ání mlilanú Yesu iwi asón, basúná mli ɔɔɔkwaltá ibu mutɔ é. ²²Mú su mlisi mli tsiátɔ dada amúú mlulétsiá ámu. Mli ɔwólí lalahɛ lémlé mli alí bré ámutɔ, ulɛha mli tsiátɔ leyintá. ²³Mliha Bulu ɔbwe mli klɔn pú mli agywun ɔɔpwe. ²⁴Mlitsia tsiátɔ ɔɔpweá igyi Bulu atsiábi, mú iwi letin, una dínká ɔɔɔkwali ɔkpa ámusu.

²⁵Mú su mlitɔ okugyíɔku ɔmátrá wa afunu. ɔhagyíɔha ɔbláa mu ba Okristoyin ɔɔɔkwali. Tsúfé aní féé angyí nyankpusa-oyí ɔkule amu iwi atɔ. ²⁶ɔblɔ́ ɔkítá mli á, mlumáha mú iha amlibwe lakpan. Imátsiá mlitɔ yófun owi tahé. ²⁷Mlumátepí há ɔbunsám ɔkpa ɔmle mli, amlibwe lakpan. ²⁸Owikplu mátrá wi atɔ. ɔpúu mu ibi yo agyómá, méní obénya tɔku kpá mu iwi, nyá iku é há ahá ání buma kuku. ²⁹Mlumáha ason lalahɛ kuku idali tsu mli ɔnɔ. Mboún múá ibɔ́búá ɔha, ibɔ́bwe yilé, wá labi, wá mú anupú ɔwunlín. ³⁰Mlumábwe tɔá ibéhan ɔɔɔ Wankíhé amu. Tsúfé mu Bulu lɔpɔhiɛ mli nsu, púsúná ání mubú mli, mɔ́hɔ mli nkpa eke ámu ni. ³¹Mlile ɔnsupekpan, olu pú ɔblɔ́kpán, utré, isia pú lakpan kugyíku agywun le mlitɔ. ³²Mboún mliwa awitɔle ha aba. Mliwun aba nwe, amlisi lakpan kie aba fé alí amúú Kristo su Bulu lési mli klé kíé mli ámu.

Akristofɔ Atsiábi

5 ¹Íniá Bulu abí ání ɔtehié dwé mlygyí su á, mlitsia mu atsiábi. ²Mludwe aba ɔkpagyíɔkpasu, fé alíá Kristo lɔdwe aní, tsúlá ɔɔmɔ mu aní su. ɔlɔpɔ mu iwi bwé atɔ hahé pú afɔdiɛ-abɔtɔ́á ibu ɔfan fánfáánfán há Bulu, ilegíi mu ansí.

³Bulu latin mli iwi. Mú su mlumáwa atsi múa ayin asón, wá hakpan, ntée ɔnsípe. ⁴Mú ɔma a, uma aléá mléblí asón ání ibu péli pú múá uma anulé, ntée wá ɔplɔkpan. Mboún

mlɪda Bulu ipán brégyíbré. ⁵lwánkɪ mlɪ ání mbua ɔɔɔpú, ɔhakpan ntée ɔnsípe ɔwapú ɔkuku méenya ogyíkpa Kristo mba *Bulu iwíegyí ámutɔ. (Tsúfé ɔnsípe ɔwapú gyí fé ɔkpu ɔtswépu).

⁶Mlumáha ɔkpa ɔhaa ɔpúv asún ání uma labi kuku mlé mlɪ. Tsúfé tsiátɔ laláhe anfi odu sù Bulu tenyá ɔblɔ bíttí ahá ání bubu asutɔ-ɔnlun usv ní. ⁷Mú sv mlumápu amú gyi mba. ⁸Bré ámv a, oklúntɔ mltsie mlidé lakpan bwe, táme séi á, mlu anɪ Wíenyɔ mlɪlabwé ukule. Mú sv mltsie wankɪtɔ. Ínu sv mlɪ tsiátɔ isúna ání mltsie wankɪtɔ. ⁹Tsúfé ɔhá ání ɔbu wankɪtɔ ɔɔbwé yilé. Mv asún da ɔkpa, ɔbu ɔɔkwali. ¹⁰Mú sv mlɔɔ mbódí amlɪkasɪ tɔá Bulu tekle. ¹¹Mlumágyi mba. Labi kuku uma mútɔ. Mboún mlɪle amú bwehé ɔwan. ¹²Íhé bu pélu ání béblí ntobíá ahá butɔɔbwé ñáintɔ iwɪ asún kúráá. ¹³Táme ní itɔ wankíhé iwánkí wólí tɔá ibv oklúntɔsv á, itemlí itowunhe. ¹⁴Tsúfé atɔ wankíhé telé tógyítɔ ɔwan. Mú sù beblí bee,

“Ɖɔɔɔpú, tsinki.

Kusv tsu afúlitɔ,

Kristo ɔwankɪ wvli fúsú.” nɪ.

¹⁵Ínu sv mlɪkɪ mlɪ tsiátɔ wankláán. Mlumátsiá nkpa fé aha mimláhe, mboún mltsia fé atiansɪpu. ¹⁶Ní mlenyá bréá mlɔpɔbwé itɔ wankláán á, mlumáyintá mú. Tsúfé lalahébwe lamóní alɪ bré ánfɪtɔ. ¹⁷Mú sv mlumábwe mimlála. Mboún mlɔɔ mbódí amlɪbɪ tɔá anɪ Wíe tekle, amlɪbwe mú.

¹⁸Mlumánu ntá bú, tsúfé iteyíntá ɔha. Mboún mlɪha Ɖhé Wankíhé amv ɔbula mlɪ brégyíbré. ¹⁹Mlɪpu Bulu asún wá ulv, amlɪwa ulvá Ɖhe Wankíhé lɔpuwá mlɪ klɔntɔ putɔɪ kpla aba; amlɪwa ulv é tsu mlɪ klɔntɔ kanfv anɪ Wíe. ²⁰Mlɪda anɪ Sí Bulu ipán tógyítɔtɔ brégyíbré, anɪ Wíe Yesu Kristo idátɔ.

Akristofɔ Akúlu Múa Aká Tsiátɔ

²¹Mlɪba iwɪasɪ ha aba fé alɪá mlɪteba iwɪasɪ há Kristo.

²²Ɖtsɪ, ba iwɪasɪ ha fú kúlu fé alɪá futeba iwɪasɪ há Kristo. ²³Tsúfé okúlu bu túmi mv kasv, fé alɪá Kristo bu túmi ɔpasua ámusv. Ɖpasua ámv gyí mv ɔyulúv, Kristo

amu onutó gyí mú ɔlepú. ²⁴Alí á múú ɔpasua ámu teba iwiasí há Kristo amu a, alí kén ɔká é ɔbá iwiasí ha mu kulu tógyítótó ni.

²⁵Akúlu, mlidwe mli aká fé alí á múú Kristo lódwe ɔpasua ámu, tsúlá bɔmɔ mu mú su ámu. ²⁶Kristo lótsulá bɔmɔ mu pútín ɔpasua ámu iwí há Bulu. Olebie ɔpasua ámu ntsu, pú mu asún ámu gyóra mú iwí. ²⁷Omekleá ifin pú asvansu bétsiá ɔpasua ámu iwí, ntée mú ɔtunekv íbɔkpukpúú tiá, méni íbɔwa mu onutó ámu akíle fé obitebí, ɔbékpa mu ba mu iwí wá. ²⁸Alí kén lehián ání oyin ɔbódwe mu ka fé mu iwí ní. Oyin ání ɔtɔdwé mu ka tɔdwé mu onutó iwí. ²⁹Tsúfé ɔhaa tamalú mu iwí, bulá ɔtebúlá mu iwí, kí mu iwísv wankláán fé alíá Kristo é tɔbwé há ɔpasua ámu. ³⁰Tsúfé aní féé anígyí Kristo ɔyulúv iwí ntobí. ³¹Fé alíá bɔwanlín wá Bulu asún ámutɔ bee, “Íni su oyin ɔbénatí sí mu sí muv mu yin, yémantá mu kasv. Fówun amú abanyó ámu bóbwe ɔyulúv kule” ni. ³²Ɔnɔkwali, Bulu asún ñaínhé anfitɔ bu odwin. Ndekú mbée, Kristo muv ɔpasua ámu iwí asún igyi. ³³Mli é mli asún igyi. Mú su ntráa nde mli bláa mbée, oyingyíoyin ɔdwée mu ka fé mu onutó iwí, ɔtsi é obu mu kulu.

Abí Múa Akwúpú

6 ¹Abí, mli aní Wíenyɔ mlílabwé kule. Mú su mlíbu mli akwúpú. Tsúfé múgyí tɔá ida ɔkpa ání mlóbwe ní. ²Íni gyí mbla ámutɔ gyankpapvá ɔlehie oyúla mántá músú ní. “Bu fú sí múa fú yín, ³méni íbɔwa alé há fú. Fówun fédan fulí nwun fú nkpa ánfítɔ.”

⁴Abí así, mlímátsiá wá mli abí ɔbló. Mboún mliyai amú, amlisuna amú ató alíá aní Wíe tekle.

Nkpábi Pú Amú Awíe

⁵Nkpábi, mlíbu mli awíe. Mlunya amú ifú, amlíbu amú tsu mli klontɔ fé alíá mlítobú Kristo. ⁶Mlímábwe yilé amú ansító alíá békánfú mli sv. Táme fé Kristo nkpábi a, mlíbwé ató tsu mli klontɔ fé alíá Bulu tekle. ⁷Mlíle iwítv yɔ agyómá

ansigyísú ha amú, fé Kristo mlidé mú yɔ há, megyí nyankpusa. ⁸Mlidunka ansí ání aní Wíe ɔbéka ɔhagyíɔha ɔkɔ, ɔtɔ wankláán kugyíkuá ɔɔbwe sv. Ní ɔkpábi fugyi o, futsie fú iwɔsv o.

⁹Awíe, mli é mlíkita mli nkpábi wankláán, fé alíá nablí ɔɔtsun. Mlumábwe amú kpóunkpóun. Mlíkaun ání mliá amúnɔ féé owíe ámu bu ɔsúsú. Mu mú ɔtamakí ɔhaa ansítú.

Bulu Akɔtɔ

¹⁰Mí asún tráhe-tráhe gyí, apíó, mlitsun ania aní Wíenyɔ ɔkɔlebwesv amlíha mu ɔwa mli ɔwɔnlín tsu mu túmi kpɔnkpɔntí ámutɔ. ¹¹Mlidida ɔsá-akɔtɔ fééá Bulu lahá mli ɔbéé, mlipúko ɔɔbunsám, ménu mlétalí líí mu ɔmle ámu ɔnɔ. ¹²Tsúfé megyí ania anyánpóusa dékɔ. Mboún ania ɔɔɔtɔ túmi laláhe, atúmipu pú *ɔɔɔe laláheá bubu ɔyí klúnhe anfitɔ pú ɔtínegyíɔtíné dékɔ. ¹³Mú sv mlidida Bulu akɔtɔ ámu féé, ménu ekeá laláhe ku ifwíe mlitɔ á, mliuméesrí, mlétalí líí mú ɔnɔ, trá nya ɔɔɔe wá ɔwɔnlín líí kínkíínkín.

¹⁴Mú sv mlíkusu, amlída iwɔsv. ɔnɔkwaltwa ibwée ɔféá ɔklí mli osíésú. Yilébwe ibwe mli kántɔ-atíntɔ. ¹⁵Iwɔsvuda há iwílwii asun wankláán ámutɔ kutá pú mú blí ibwée mli ɔsátɔ ntukvta. ¹⁶Ínu féé ɔma a, mlíkita Kristo hógyi amutɔ brégyíbré. Ibwée mli atíntɔá mlíspɔtin mli iwí, ménu ɔɔbunsám mbun píɔnpíɔn ámúú ɔdetsúun amutɔ kuku ɔmɔɔwɔ mli. ¹⁷Mlipu Bulu nkpahɔɔ amu bwe mli kutupa. Mlíkita Bulu asún ámutɔ, ibwe mli ɔsátɔ ɔdayí ání *ɔɔɔe Wankíhé amu tehá mli. ¹⁸Mlíha Bulu ɔɔɔe ámu ɔkpa mli, amlíbo mpái brégyíbré. Mlíkuh Bulu, ɔtsa mli ɔkpagyíɔkpasv. Mú sv mlidunka ansí iwɔsv. Mliumási mpái ɔɔ há Bulu ahá féé. ¹⁹Mlíbo mpái ha mu. Ní nobwíí ɔnɔ á, Bulu ɔpúú mu asún ámu wa mí ɔnɔ; ɔha mí antali wa klun bli asun ɔɔáínhé amúú ibv mu asun wankláán ámutɔ ámu féé. ²⁰Asún ámu iwí sumbí ɔyɔpɔ ngyi. Mú ɔkanda sú nda obu ní. Mlíbo mpái mlíaa, Bulu ɔhá mí antali wa klun bli mú alíá ilehián.

Uklá

²¹Osúmibi ɔnɔkwaltpu aní píó ɔdwepú Tihiko gyí aní Wíe agyómá ámutɔ. ɔbébláa mli mí iwí asún féé, ménu mlébi



Efe

RomaƔɔ lsa Ɖkɔpɔ (Efesofɔ 6:11-17)

alɔ́a ngɔi pɔ́ tɔ́a ndɛbwe. ²²ɔ́nɔ kóún sɔ́ nde mu wa mlɔ́ wá ní. Ndeklé mbée, ɔ́bebláa mlɔ́ alɔ́a tógyítɔ́ ide músú yɔ́ nfi. Ɖɔ́ɔi kpla mlɔ́ pɔ́wa mlɔ́ ɔ́wɔnlín.

²³Ɖsí Bulu muva anɔ́ Wíe Yesu Kristo buháa mlɔ́ ahógyipu amu fée iwilwii. Buháa amlɔ́tsia dwe aba, mlɔ́ ansí idinka Bulusu bré fée. ²⁴Ogyíi ahá ání butamasí anɔ́ Wíe Yesu Kristo dwe fée buale.